

明詩紀事

第十二册

明詩紀事

貴陽陳田輯

戊籤

尹臺 十二首

臺字崇基永新人嘉靖乙未進士選庶吉士授編修
歷中允修撰諭德侍講遷南祭酒改北進少詹兼學

士遷南吏部侍郎就遷禮部尙書有洞麓堂集十卷

四庫總目臺以護持楊繼盛一事爲清議所歸集首鄒
元標序稱其詩力追唐雅制疏書序記銘狀表出入
漢宋闡釋名理不屑綺語今核其所作尙不誣云
田按尙書不附和武定分宜其官南都詮部保全譚
襄敏直西苑撰青詞時有諷諫大節可謂不阿當時
不以詩名擷其佳作雅質風藻不愧名家

別饒子聞

葛生在河渚，縣延自結根。何意中林楚，垂蔓相翩幡。人生託
交故，義合情與存。甯期時命怫，懿好不久敦。棘瓜有芳實，三
歲零寒原。幸蒙攀采惠，棄遠難重論。

黃憲墓

漢季多高賢，黃生特淑妙。白璧出塵匱，羣琛仰孤照。所悲朗
粹質，中隕沈靈曜。雖寡河汾譔，不殊廣川調。我行歷楚墟，問
道回山嶠。側思千載人，悽惻墓堂弔。

寶寂寺宴集用壁間韻

尋春入始夏，嘉宴洽今時。蘿擁巖扉寂，花飄石棧危。絃歌娛
日晚，車馬下山遲。坐惜華宵月，因吟鄴客詩。

嘯巖寺泊

維舟依古寺解纜溯幽源花發渚煙聚草青江雨繁魚梁交
石嶼鳥路界山村坐羨垂綸者看雲過曉昏

南臺寺

竹隱珠泉溜蘿垂錦壁陰危臺迸日峻飛閣裊雲深玉髓行
堪掇金芝往獨尋暫詣靈岳賞一慰尙平心

礪峯陟南禮侍余在金陵引跂迄左一覲余改北雍礪
峯入覲得覲無幾復別去作詩敘往用抒積思

久矣金扉載筆從每嗟詞賦擅雍容那知北固煙中旆仍別
西清雨外鐘柳曲樽疊經歲憶花邊笑語幾時逢蓬萊出入
神仙地曰極天南綵霧重

河間道中

倦客風塵未息機
雙旌馬首趁殘暉
渾沱水落魚龍靜
反澤春深雁鶩歸
黑髮虛名慙敝帚
青山獨往泥征衣
芙蓉玉筍菟裘計
老大空悲願每違

山行絕句二首

秋花映路開無數
可愛紅枝間白枝
不聽疏林黃葉墜
風光渾道是春時

漁家四五西山側
苦竹陰疏自一村
昨夜溪添三尺水
沙鷗無數到柴門

西湖竹枝詞

朝見南高峯欲雨
北高出日又多時
綠虹宛轉垂照水
欲渡無船郎得知

西湖采蓮曲

湖市羅裙映玉缸
蘇隄楊柳拂船窗
采蓮誤觸鴛鴦起
飛向花間箇箇雙

寄趙白樓總兵

上谷將軍趙白樓
忠精長貫赤虹流
慣馳匹馬獵深澤
自射名王黑水溝

郭朴

二首

朴字質夫安陽人嘉靖乙未進士選庶吉士授編修
歷侍講左庶子侍講學士遷禮部侍郎改吏部加太
子賓客進南禮部尚書加太子少保改北尋改吏部
尚書加太子太保兼武英殿大學士參預機務加太

保少傅兼太子太傅贈太傅諡文簡有集五卷

田按史稱文簡兩典銓衡以廉著惜輔政未久退歸優游林下三十年觀其詩詞從容暇豫與貴溪輩之躁進獲禍者殊科矣

閒居二首

性僻真堪隱境幽心益閒灌園安鄙事採藥理衰顏林鳥陪吟咏溪雲共往還落花苔徑滿蓬戶日常關

小築成村墅幽栖與懶宜看花聊酌酒對竹漫哦詩老眼雲山媚閒情魚鳥知獨將農圃業仰戀太平時

趙貞吉二首

貞吉字孟靜內江人嘉靖乙未進士選庶吉士授編修遷中允擢左諭德以事下詔獄廷杖謫荔波典史

遷徽州通判進南吏部主事累遷戶部侍郎以忤嚴
嵩奪官隆慶初起禮部侍郎進南禮部尙書仍留直
講兼文淵閣大學士參預機務加太子太保贈少保
謚文肅有集二十三卷

田按文肅詩豪曲快字不得以成派繩之

王喬洞

柯爛人歸古木寒紺巖靈壑野雲團騎來黃鶴丹砂頂飛去
青天白玉棺流水調中春欲半洞簫聲裏夜將闌思輕塵骨
超千劫願遇金童捧一丸

宿蘇長公洗墨池亭作

江空草綠酒旗風半醉黃州煙雨中五百年來名輩盡有人

重唱大江東

王立道 十首

立道字懋中無錫人嘉靖乙未進士選庶吉士授編

修有具茨詩集六卷文集九卷遺稿一卷

四庫總目立道詩雖微嫌婉弱而冲容淡宕不爲奇險之語猶有中唐錢劉之遺

張治龍湖集懋中詩冲雅駸駸入韋柳門戶槐野存笥稿懋中談詩稱張司業劉隋州及索其自

作讀之果皆似田按懋中入翰林故事館師課之而已嘉靖乙未永

陵臨軒試之選三十人懋中第一懋中爲唐荆川妹

聳文學歐陽詩學中唐年三十八卒同時名輩哀悼

之王槐野作傳張龍湖唐荆川作志銘尹洞山作解

王子哀文洞山文詞旨最美今洞麓堂集不載當在

未刻稿中也

詠史

館陶主人翁洛陽賣珠子散金買聲名寵愛傾戚里翩翩東方生滑稽何其鄙一朝辟戟言萬乘逡巡起雄畧代所希舉俗憎逆耳坐令狐鼠驕白日遊都市

銅雀伎

漳河流日夜歌舞未能休豔色今誰妬餘香空自留朝雲不作雨陵樹早生秋滿目多疑塚君靈在此不

遊仙二首

仙人住玉京累劫道初成指樹元非姓殮松偶得名龍嘘雲蓋引虎奉嶽圖迎相待天台路何時返赤城

玉室書名久清溪得道初赤文河上錄鴻寶枕中書龍吐燒丹火鸞驂度海車偶來華表上終與世人疏

泛清溪

幽尋極寥廓理棹清溪長落日照孤嶼微風生夜涼須臾遠
氛淨百里開湖光漁子相傍宿月明歌滄浪採芳不能浴悄
然悲沅湘

秋居用唐人韻二首

四戶嘑蜚亂秋陰欲上階菊花收作枕草蔓緝成鞋得句先
書壁因琴別置齋溪雲與山月總不費安排
木落隨寒雨林開際遠天水紋搖簾竹秋氣入琴絃倚樹禽
相語班荆鹿共眠機心日以盡自訝骨如仙

題顧洞陽青溪莊二首

罷官閒愈好負郭有瓜田宦味陶元亮詩才賈浪仙高齋聽

雨枕斜日過湖船誰共幽吟者空聞招隱篇

知君閉關久一徑落花深書癖年長在春盟詩至尋空山幾
兩屐遠道四愁吟北望休相笑平生魏闕心

送蔣醫歸江陰

遠向金門欲獻方暫因採藥去江鄉開逕我須從蔣翊避名
君莫似韓康

靳學顏

五首

學顏字子愚濟甯州人嘉靖乙未進士除南陽推官
歷吉安知府累遷布政使入爲太僕卿改光祿以右
副都御史巡撫山西召爲工部侍郎改吏部有兩城

集二十卷

四庫總目學顏詩格律清整蹊徑尙存不脫歷下流派
升菴集瀑布詩人盛稱廬山雁蕩亦有之地志云廬
山循崖直下不如雁蕩之飛墜飄散而可觀也吾蜀
梁山縣蟠龍山有之與雁蕩相似斬兩城云大勝廬
山有詩云神女碧瑤簪明珠構瓊瑤纖手按鍾球鈞
臺響天樂仙人環珮玉珊珊曉跨蒼龍謁帝關醉舞
婆娑渾忘卻天風吹挂翠微間
田按子愚頗擅才華集中有七諷解嘲等篇類以作
者自命詩則古體摹襲前人時有佳篇近體率意頽
唐余檢明史子愚巡撫山西時應詔陳言敷陳愷切
深中時弊而兩城集不存此篇此則編集者之過也

長安道

金絡青絲繩翩翩紫騮馬白面誰家郎借問冶遊者調笑章
臺側繫轡垂楊下垂楊穆穆白日長壚頭春酒鬱金香高樓
思婦舉珠箔碧草如煙空斷腸

東京歌

濯龍門前車馬流
無人不道入青樓
盧家少婦鳴箏坐
逢著春光不解愁

渭城曲

春風送客渭城西
折柳亭前落日低
驄馬漸隨塵影沒
黃鸝飛上戍樓颺

陽春臺

陽春臺上雪霏霏
漢水無情日夜歸
楚客不知何處去
歌聲猶逐綠雲飛

卽事

石磴參差蔓薜蘿
空亭獨坐夕陽過
不知溪上秋多少
但覺尊前落葉多

王維楨 六首

維楨字允甯華州人嘉靖乙未進士選庶吉士授檢討
歷修撰諭德遷南國子祭酒以省母歸值地震陷
死有槐野存笥稿二十卷

藝苑卮言王允甯詩如馬服子陳師自作奇正不得
兵法又如項王嘔嘔未了忽發啞鳴
詩藪嘉靖時爲杜者王允甯孫仲可爲六朝者黃勉
之張愈光允甯於文矯健勉之於學博洽皆勝其詩
列朝詩集允甯論詩服膺少陵自謂獨得神解尤深
於七言近體以爲有照應開闔關鍵頓挫其意主與
主比其法有正插有倒插而善用頓挫倒插之法者
宋元以來惟李崆峒一人及其自運則麓笨棘澀澤
穢滿紙如潦倒措大經書講義填塞腹笥拈題豎義
十指便如縣錐累人捧腹良可笑也
田按允甯與張太谷書云本朝作者空同聖矣卽大
復猶卻數舍若倒插頓挫之法自少陵後善用之者
空同一人而已牧齋培擊崆峒故於允甯醜詆不遺
餘力余檢何元朗四友齋叢說云許石城得顧東橋

文衡山蔡林屋王雅宜諸人詩裝成卷求槐野跋語
槐野逐句破調無一當其意者信乎天道好還宜來
牧齋之醜詆也允甯五律亦有佳篇竹垞有句無篇
之說亦爲牧齋之論所懾耳

送駱太史謝病歸湖州

忽謝金門直言尋碧海濱明時豈無意旅病苦傷神白髮愁
中長青山夢裏真知非鷗鷺侶暫與薜蘿鄰

廣德寺送別陳子

俱是游京國獨憐尋故山鄉心因子劇別句對僧刪枯沼風
荷咽空林夕鳥閒前程愁欲暮乞與一燈還

孝烈皇后挽歌

範內留芳訓扶天有駿功仙遊知跨鳳聖念爲當熊玉珮虛
無裏蒼雲悵望中宜春花照眼淚灑舊時叢

長陵恭謁

文皇陵殿傍居庸覽盡千峯壯此峯石壑蒸雲蹲虎豹玉泉
含霧卧蛟龍舊京想像明王祚窮漠淒迷破虜蹤埋劍藏弓
元勝地晚來時望紫氛重

春意

春意今朝動鄉關萬里遙客心共江柳日夜緒千條

苦熱行

海上三山寒色開丹梯何處陟崔嵬道人晝卧洪鑪裏赤腳
蒼崖夢往來

劉繪

五首

繪字子素光州人嘉靖乙未進士授行人遷戶科給